

皇朝藩部要略

皇朝藩部要略卷之八

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張穆 覆審

外蒙古喀爾喀部要略六

二十四年正月

命土謝圖汗部郡王副將軍桑齋多爾濟督解駝馬送
烏里雅蘇台軍營二月桑齋多爾濟請以茶布易俄羅
斯馬

皇朝通志卷之八
二
詔如所請。輔國公齊旺多爾濟擒自喀喇木蘭叛逃之厄魯特丹巴等。

諭獎之。

賜雙眼孔雀翎。嗎哈沁盜薩拉布拉克汎馬。

詔賽因諾顏部郡王車布登札布越阿爾台。沿途偵緝阿巴噶斯哈丹。及綽囉斯台吉烏勒木濟。車木楚克札布。參贊其軍。親王成袞札布奏遣長子額爾克沙喇偕參贊大臣札隆阿。分路繼進。

諭曰。額爾克沙喇奮勇有爲。朕所深知。與其同行。不若獨往。庶無掣肘。可卽赴札隆阿營。代領其眾。但車布登

札布已先行兩月餘盜馬賊人又非大隊著暫停前進成袞札布亦奏言時近秋若令額爾克沙喇赴車布登札布處馬力疲且薩拉布拉克汎邇被掠額爾克沙喇業起兵請自烏魯木齊赴察拉垓等處牧馬緝賊兼令台吉烏木布濟率兵策應

報可夏四月

詔車布登札布由塔爾巴噶台赴特穆爾圖諾爾協剿霍集占會將軍兆惠已率兵進葉爾羌

諭車布登札布由博羅呼濟爾還駐伊犁七月

命額爾克沙喇赴哈薩克部界偵禦札薩克圖汗部公

品級多岳特隨車布登札布赴伊犁追捕嗎哈沁賊一等台吉車都布多爾濟從額爾克沙喇捕嗎哈沁賊車臣汗部二等台吉袞布札布擒嗎哈沁賊珠靖特穆爾獎賚幣車都布多爾濟尋隨杜爾伯特郡王車稜烏巴什等追剿烏梁海宰桑庫克辛盡降其眾
詔嘉之

命乾清門行走先是烏梁海人郭木薩以擅殺懼罪遁俄羅斯車都布多爾濟追至和甯嶺縛之獻至是并賚幣示獎八月

詔賽音諾顏親王成袞札布安置新撫烏梁海眾貝子

品級齊旺多爾濟父德沁札布奏本旗丁戶滋眾請增編佐領授齊旺多爾濟轄別爲一旗

詔從其請授札薩克十月以車布登札布追剿嗎哈沁不力傳

旨訓飭回部底定

命成袞札布宣

諭眾喀爾喀知之十一月成袞札布奏撤布延圖兵還烏里雅蘇台十二月成袞札布車布登札布車木楚克札布

召覲京師

賜宴。

獎賚遣歸尋

授車布登札布所部副將軍。先是青衮咱卜之叛。車臣汗部鎮國公成袞私歸游牧。議削爵。

詔赴鄂爾坤效力贖罪。至是卒。

諭曰。成袞自獲罪後。雖無效力之處。但念伊卒于軍營。究屬可憫。著伊子德木楚克降襲札薩克一等台吉。不必仍襲公爵。

二十五年。車臣汗部札薩克輔國公格埒克巴木丕勒來朝。晉鎮國公。

賜黃馬褂。札薩克固山貝子旺沁札布以輕刑斃命。削札薩克。

詔以其弟一等台吉貢素隴札布襲別封旺沁札布爲閑散鎮國公。復授車臣汗部人納旺伊什桑齊璘沁札薩克一等台吉。

諭曰。納旺伊什與桑齊璘沁削職後。留居軍營。效力有年。現在軍營無事。伊等所獲之罪。不過昏愚所致。著加恩給還原職。烏梁海爲哈薩克部人巴圖克巴圖爾所掠。賽因諾顏部公額爾克沙喇獲被掠者。詰之。告以烏梁海游牧遠。以故被掠。且哈薩克汗阿布賚遣使至。欲

擒獻巴圖克巴圖爾

諭曰額爾克沙喇久駐哈薩克界可撤兵還卽以朕旨
宣諭曰劫掠烏梁海係巴圖克巴圖爾一人所爲與其
部長無涉使彼知之尋車布登札布偕車木楚克札布
擒獲巴圖克巴圖爾札薩克圖汗子公品級齊旺巴勒
齊扈

駕木蘭行圍

賜孔雀翎郡王巴勒達爾及子齊旺巴勒齊賽因諾顏
部貝子品級齊旺多爾濟車臣汗部二等台吉袞布札
布扈

駕木蘭行圖。

命巴勒達爾射。

賜三眼孔雀翎及黃馬褂。齊旺多爾濟雙眼孔雀翎。
賜齊旺巴勒齊袞布札布孔雀翎。袞布札布格埒克巴
木丕勒長子。

命賽因諾顏親王副將軍車布登札布圖形

紫光閣。

御製讚曰。拍馬彎弓。無敵所向。不曾讀書。如古名將。和
落霍斯。少勝眾彼。超勇親王。額駙之子。是年。賽因諾顏
部公三都克車木伯勒以病罷。子車登札布襲土謝圖。

汗部札薩克固山貝子根札布多爾濟卒

詔其子車布登多爾濟襲固山貝子弟格齊多爾濟襲
札薩克別授公品級賽因諾顏部札薩克多羅貝勒納
克札勒齊素噶卒第三子齊默特多爾濟襲

二十六年三月賽因諾顏親王奏喀爾喀汎舊設阿爾
台今準夷回部底定向時戍區俱成內地請展札哈沁
烏梁海喀爾喀等汎資耕牧業

詔會勘尋奏柰曼明安奎度濟察罕布爾噶蘇所設汎
宜展至烏魯木齊烏梁海內大臣察達克等勘巴顏珠
爾克奎烏拉克沁伯勒齊爾及烏魯木齊可設汎十五

俱相隔百里爲率軍機大臣遵

旨議柰曼明安舊汛應遠徙但千里長途喀爾喀難遙
制應將附近烏魯木齊之烏爾圖布拉克賽塔喇納里
特濟木薩四汛令索倫綠旗兵駐防其蘇伯昂阿至烏
拉克沁伯勒齊爾十一汛令成衮札布督理

從之土謝圖汗部副將軍郡王桑齋多爾濟妄奏定邊
左副將軍親王成衮札布選兵弗公

訓飭之尋奉

命赴恰克圖購馬時車臣汗部一等台吉貢楚克札布
督牧軍駝尋

命赴恰克圖助桑齊多爾濟購馬事。有劫賊羅卜藏錫喇布者，冒章嘉呼圖克圖名，沿邊肆擾。車臣汗嘛呢巴達喇擒送京師。

賚幣車臣汗部貝勒丹津，由烏里雅蘇台解馬赴巴里坤。札薩克圖汗部公品級多岳特解軍需赴伊犁。濟貝子額爾克沙喇軍以葉爾羌之捷。

賜札薩克圖汗部凱宴，鎮國公朗袞札布留駐軍營。

頒賜銀幣，賽因諾顏公額爾克沙喇解伊犁牲畜道斃，議價。

詔免其半，以賽因諾顏副將軍郡王車布登札布剿嗎。

哈沁色布騰逸走追不力

訓飭之會俄羅斯獻色布騰仍

資之幣

命同部郡王車木楚克札布子貢楚克札布扈

駕木蘭行圍

賜孔雀翎十二月

授車布登札布副盟長

二十七年札薩克圖汗部札薩克一等台吉諾爾布解
軍駝赴伊犁賽因諾顏部親王品級車布登札布奉使
西藏同部輔國公多爾濟自游牧復赴伊犁軍營道卒

子沙克都爾札布襲

賜土謝圖汗部郡王齊巴克雅喇木丕勒次子齊巴克
多爾濟公品級土謝圖汗部札薩克輔國公蒙固以病
罷子索諾木辰伯勒襲同部札薩克一等台吉齊巴克
札布亦以病罷子額琳沁多爾濟襲尋扈

駕木蘭行圖

賜孔雀翎時賽因諾顏部貝勒齊默特多爾濟亦在行
圖

諭曰齊默特多爾濟之始祖袞布本喀爾喀舊札薩克
首先來歸封郡王爵嗣降襲貝勒已歷四世著加恩令

其世襲罔替

二十八年札薩克圖汗子齊旺巴勒齋署盟長土謝圖汗部公車登三丕勒赴恰克圖駐防札薩克圖汗部鎮國公朗袞札布以展汎界偕烏梁海內大臣察達克由巴顏珠爾克奎烏拉克沁伯勒齊爾及烏嚕木齊路定十五汎俱相隔百里爲率

詔如議尋與土謝圖汗部輔國公車布登多爾濟同部公三達克多爾濟長子車稜多爾濟扈

駕木蘭行圖

賜黃馬褂

命乾清門行走車布登多爾濟等。

賜孔雀翎。賽因諾顏部親王成袞札布來朝。以督理烏梁海與哈薩克互市協夷情。

諭獎之。先是賽因諾顏部貝勒佛保陷賊。其兄沙克都爾札布代襲貝子。至是沙克都爾札布卒。其子敦多布多爾濟與佛保入覲。

詔敦多布多爾濟襲貝子。而封佛保爲輔國公。

命乾清門行走。是年札薩克圖汗部札薩克一等台吉根敦卒。子車都布多爾濟襲尋。

命防護杜爾伯特游牧。

二十九年四月。賽因諾顏親王成袞札布奏烏里雅蘇台舊城圯。應增修。

報可。

詔授札薩克圖汗部郡王品級貝勒車都布盟長。

賜同部署盟長齊旺巴勒齋黃馬褂。七月。以成袞札布勒索倫逃兵。未疏奏。

訓飭之。土謝圖汗部札薩克達瑪琳札布扈

駕木蘭行圍。

賜孔雀翎。十一月。成袞札布復奏烏里雅蘇台土淨。難興版築。舊城在齊格爾蘇特烏里雅蘇台二河間。應照

舊造木城增高丈六尺厚一丈周圍共五百丈內外排木柵中實土東西南各置門北迎河掘溝引水環之卽以溝土築城報

聞是年土謝圖汗部札薩克輔國公三達克多爾濟卒長子車稜多爾濟襲賽因諾顏部札薩克輔國公車登札布卒

詔其父三都克車木伯勒仍復原職

三十年車臣汗嗎呢巴達喇來朝

命御前行走

命札薩克圖汗部副將軍郡王巴勒達爾御前行走

賜同部郡王車都布黃馬褂。

授土謝圖汗車登多爾濟所部副將軍。同部郡王齊巴克雅喇木丕勒盟長。兼所部副將軍。土謝圖汗郡王桑齊多爾濟議私與俄羅斯互市罪。

詔削爵尋

命復封多羅郡王。土謝圖汗部公車布登多爾濟轄烏里雅蘇台軍營學舍。車臣汗部貝勒達克丹多爾濟扈駕木蘭行圍。

賜雙眼孔雀翎。是年土謝圖汗部輔國公齊旺多爾濟卒。仍令其父車布登襲。札薩克圖汗部一等台吉噶爾

丹達爾札卒子拉克沁噶喇襲

詔授札薩克給印編佐領一隸喀爾喀札薩克圖汗部以札克畢賴色欽畢都哩雅諾爾盟長轄之

三十一年

命土謝圖汗車登多爾濟乾清門行走

賜三眼孔雀翎及黃馬褂土謝圖汗部札薩克一等台吉車布登以私易所解達哩剛愛馬爲同部親王桑齋多爾濟所劾

詔削職其子不得襲以弟車登襲札薩克圖汗部公品級喇布坦以老罷子鎮國公朗袞札布卒孫索諾木多

爾濟襲公品級札薩克一等台吉尋襲鎮國公同部鎮國公旺舒克以病罷子拉旺多爾濟降襲輔國公札薩克圖汗部札薩克諾爾布送馬四千赴烏魯木齊賽因諾顏部親王成袞札布長子貝子品級額爾克沙喇卒成袞札布以額爾克沙喇子阿穆爾拜車布木達什幼其弟伊什札木楚詣旗務奏請襲爵並遣入覲許之

詔停襲貝子品級以伊什札木楚襲輔國公阿穆爾拜車布木達什各授一等台吉二十二年成袞札布奏同部輔國公達什督驛稱職

諭獎之。

賜孔雀翎。至是復以哈什圖五站雪盛損畜達什酌撥各游牧餘馬供使無悞。

詔晉封達什鎮國公。是年賽因諾顏親王成袞札布奏所部來歸。初親王善巴爲同族長。又世掌丹津喇嘛所遺印。請視三汗例以善巴曾孫親王諾爾布札布襲賽因諾顏號。

詔允其請。追襲其祖圖蒙有所遺賽因諾顏號。

賜之印。俾與土謝圖汗車臣汗札薩克圖汗均世襲罔替。尋

授所部副將軍。

三十二年。

賜札薩克圖汗兼多羅郡王巴勒達爾杏黃轡。

命其子齊旺巴勒齋。

乾清門行走。

賜土謝圖汗部札薩克一等台吉袞楚克車璘黃馬褂。

賽因諾顏部輔國公伊什札木楚扈。

駕木蘭行圍。

賜黃馬褂。

命乾清門行走。是年車臣汗嘛呢巴達喇卒。弟車布登。

札布襲汗來朝

命乾清門行走車臣汗部鎮國公格埒克巴木丕勒長子二等台吉袞布札布擒逃賊圖什爾格

賚幣土謝圖汗部貝子達什丕勒奉

命赴瀚海督牧軍駝

三十三年授車臣汗車布登札布盟長札薩克圖汗署盟長齊旺巴勒齋轄烏里雅蘇台軍營學舍賽因諾顏部親王車布登札布入覲

賜第京師

三十四年賽因諾顏部公品級三等台吉噶瓦卒理藩

院議停襲

詔仍以其子桑濟襲

命土謝圖汗車登多爾濟御前行走

賜紫轡土謝圖汗部公品級齊巴克多爾濟扈

駕木蘭行圍

賜孔雀翎授札薩克圖汗部盟長郡王車都布所部副將軍

賜車臣汗車布登札布三眼孔雀翎及黃馬褂土謝圖汗部郡王丹忠多爾濟扈

駕木蘭行圍

賜三眼孔雀翎。是年土謝圖汗部札薩克輔國公車布
登卒。孫齊素隴多爾濟降襲札薩克一等台吉。札薩克
圖汗巴勒達爾卒。子公品級齊旺巴勒齊襲兼多羅郡
王。尋授盟長。同部札薩克一等台吉達爾巴圖亦以病
罷。子達什琳沁襲。賽因諾顏部札薩克輔國公三都克
車木伯勒卒。孫噶爾瑪襲。噶爾瑪車登札布子。同部札
薩克鎮國公貢格敦丹卒。子當蘇隴襲。

三十六年。授賽因諾顏郡王車布登札布定邊左副將
軍。尋授盟長。同部郡王車木楚克札布所部副將軍車
臣汗部札薩克輔國公格埒克巴木丕勒卒。子袞布札

布襲札薩克圖汗部公瑪哈巴拉扈

駕木蘭行圖

賜孔雀翎賽因諾顏部親王成袞札布卒

賜銀千兩治喪子七長額爾克沙喇封貝子品級輔國
公次伊什札木楚襲輔國公次敏珠爾多爾濟封公品
級次占楚布多爾濟封世子次納瑪愷多爾濟授一等
台吉次德埒克多爾濟封輔國公次拉旺多爾濟尙固
倫和靜公主授固倫額駙

賜雙眼孔雀翎尋封世子

命御前行走至是襲札薩克和碩親王仍

命輔國公伊什札木楚克代掌札薩克同部輔國公佛保卒子三丕勒敦多克襲

三十七年

賜土謝圖汗車登多爾濟金黃轡郡王丹忠多爾濟卒無嗣弟齊巴克札布襲公車登三丕勒長子拉素隴多爾濟扈

駕木蘭行圍

賜孔雀翎

命賽因諾顏部郡王車木楚克札布長子貢楚克札布乾清門行走

三十八年。賽因諾顏副將軍車布登札布以牟利爲同部貝子品級齊旺多爾濟所訐。

詔罷左副將軍職。先是齊旺多爾濟凌其兄親王諾爾布札布爲車布登札布所斥。故深憾之。

三十九年。土謝圖汗部貝子車布登多爾濟卒。子遜篤布多爾濟襲。

賜土謝圖汗部公車稜多爾濟黃馬褂。同部札薩克敦多布多爾濟扈。

駕木蘭行圍。

賜孔雀翎。賽因諾顏部親王額駙拉旺多爾濟偕大學。

士舒赫德剿山東逆賊王倫。賽因諾顏親王品級車布登札布年七十。

賜無量壽佛及珊瑚朝珠四團龍服。

四十年。

命車臣汗車布登札布御前行走。

賜札薩克圖汗齊旺巴勒齋三眼孔雀翎。

四十一年。土謝圖汗部郡王齊巴克札布札薩克齊素
嚨多爾濟扈

駕木蘭行圖。

賜齊巴克札布三眼孔雀翎。齊素嚨多爾濟孔雀翎。

四十二年授土謝圖汗車登多爾濟盟長郡王桑齋多爾濟所部副將軍子永丹多爾濟初授一等台吉教養內廷至是

命乾清門行走

賜孔雀翎是年土謝圖汗部札薩克和碩親王齊巴克雅喇木丕勒卒子齊巴克多爾濟襲札薩克輔國公車登三丕勒卒子拉素隴多爾濟襲

四十三年授土謝圖汗部親王齊巴克多爾濟所部副將軍

賜三眼孔雀翎黃馬褂札薩克多羅郡王桑齋多爾濟

卒子永丹多爾濟襲

命御前行走

賜三眼孔雀翎是年扈

駕木蘭行圍

賜黃馬褂尋尙郡君授多羅額駙輔國公拉素隴多爾濟督理烏里雅蘇台軍營學舍

賜札薩克圖汗齊旺巴勒齋子貝喇特納公品級是年賽因諾顏部札薩克多羅郡王車木楚克札布卒子貢楚克札布襲

四十四年授土謝圖汗部郡王齊巴克札布副盟長兼

署所部副將軍。同部貝子遜篤布多爾濟

命乾清門行走。尋偕賽因諾顏部郡王貢楚克札布扈
駕木蘭行圍。

賜貢楚克札布三眼孔雀翎。及黃馬褂。遜篤布多爾濟
雙眼孔雀翎。尋授副盟長及參贊。是年。札薩克圖汗部
札薩克一等台吉達什朋素克卒。子袞布札布襲扈
駕木蘭行圍。

賜孔雀翎。授賽因諾顏親王品級。車布登札布議政大
臣。

上追念其擊賊和落霍斯功。

命繪戰圖賜之

四十五年。土謝圖汗部札薩克輔國公索諾木辰伯勒卒。子巴克巴札布襲車臣汗部多羅貝勒丹津卒。長子車稜多爾濟襲同部札薩克固山貝子達爾濟雅卒。子索諾木旺札勒多爾濟襲賽因諾顏郡王車布登札布。以擅請展牧界。削親王品級。賽因諾顏部札薩克輔國公達什卒。子喇嘛札布襲。

四十六年。

詔喀爾喀世爵。視內札薩克四十九旗例。理藩院遵旨議。首以土謝圖汗請。

諭曰土謝圖汗車登多爾濟之始祖察琿多爾濟來歸時仍留汗號嗣是子孫承襲將及百年著加恩世襲罔替諸王公並同此例

諭土謝圖汗部郡王齊巴克札布曰齊巴克札布之始祖固嚕什喜當噶爾丹作亂時首先來歸

聖祖仁皇帝念其爲喀爾喀舊札薩克優封郡王伊子孫承襲今已四世著加恩令其世襲罔替

諭貝子遜篤布多爾濟曰貝子遜篤布多爾濟之先原係王爵因額璘沁多爾濟身獲重罪削爵停襲朕念伊祖父舊勲不忍令其遠盡是以特令降襲貝子著加恩

世襲罔替

諭和碩親王齊巴克多爾濟曰齊巴克多爾濟之祖父宣力戎行屢著勞績由札薩克台吉洊封和碩親王著加恩令其世襲罔替理藩院議拉素隴多爾濟車稜多爾濟所襲輔國公係

恩封出缺時請降襲

諭曰拉素隴多爾濟之曾祖車稜巴勒蒙

聖祖仁皇帝格外鴻恩特封公爵承襲有年朕于車稜巴勒子巴木丕勒多爾濟出缺時不忍削去是以仍令其子車布登三丕勒及孫拉素隴多爾濟相繼承襲今

若照議降襲朕心殊爲不忍著加恩世襲罔替

諭車稜多爾濟曰輔國公車稜多爾濟之父三達多爾濟朕因其爲親王丹津多爾濟子封授公爵復因效力軍營送馬無悞晉貝子品級車稜多爾濟襲爵時已削去貝子品級今若復令降襲朕心殊爲不忍卽云世襲罔替於例不符此亦惟視車稜多爾濟效力如何若于烏里雅蘇台值班等事奮勉出力毫無貽悞仍許承襲公爵俟出缺時奏聞請旨

諭札薩克輔國公巴克巴札布曰巴克巴札布所襲輔國公係其祖旺布效力軍營晉封之爵著加恩令其世

襲罔替理藩院議三都布多爾濟所襲公品級例弗應
世襲俟出缺時請

旨

詔如議

諭車臣汗曰車臣汗車布登札布之曾祖烏默客來歸
時仍留汗號子孫至今承襲將及百年著加恩世襲罔
替理藩院議車稜多爾濟所襲貝勒係

恩封出缺後請降襲

諭曰車稜多爾濟所襲貝勒雖與初封及有功襲封者
不同但此原係朕施恩封授伊父丹津之爵丹津又係

車臣汗垂札布弟原任郡王貢格三丕勒之子是以出缺後仍著車稜多爾濟承襲今若照議降襲朕心殊爲不忍著加恩世襲罔替

諭索諾木旺札勒多爾濟曰索諾木旺札勒多爾濟之始祖布達札布原封貝子洊封貝勒出缺時降襲公爵嗣因達爾濟雅效力軍營勞績懋著復授貝子且令其子索諾木旺札勒多爾濟承襲著加恩世襲罔替

諭袁布札布曰袁布札布之父格塔克巴木丕勒原襲輔國公以軍務獲罪削爵嗣因赴伊犁奮勉效力復子原職經朕特降旨晉封鎮國公出缺時既經照例減等

承襲著卽將札薩克輔國公爵恩于世襲罔替

諭貢素隴札布旺沁札布曰旺沁札布之閑散鎮國公與貢素隴札布之札薩克台吉原係其祖阿南達所封貝子遞行改授之爵著加恩于世襲罔替

諭貢楚克多爾濟曰貢楚克多爾濟所襲公爵原係其祖車稜旺布抒誠效力所封朕體

世宗憲皇帝推恩之意不忍削除故令兩代承襲著恩于世襲罔替

諭札薩克圖汗齊旺巴勒齋曰札薩克圖汗號因策旺札布獲罪削爵伊族弟格埒克延丕勒承襲至齊旺巴

勒齊已襲三世其郡王爵又係齊旺巴勒齊始祖朋素克喇布坦來歸時所封俱著恩予世襲罔替理藩院議多岳特所封公品級例弗予襲

諭曰三等台吉多岳特原襲伊父格色克輔國公爵因獲罪後在軍營效力又招降烏梁海朕復施恩賜公品級雖于例不應承襲但削除朕復不忍俟出缺時詳察有無功過另降諭旨

諭車都布所襲貝勒原因博貝軍營效力由輔國公晉封之爵著加恩世襲罔替其郡王品級係因車都布之父旺布多爾濟效力所加出缺時朕不忍卽行削除是

以仍令承襲。但卽令世襲罔替于例又不可行。著暫令承襲如故。俟出缺時再行請旨。

諭瑪哈巴拉所襲鎮國公。係其祖諾爾布班第獲罪降襲之爵。拉旺多爾濟所襲輔國公。係由初封貝子降等承襲。拉沁蘇隴所襲札薩克輔國公。爵係其祖索諾木伊斯札布效力軍營所封。巴圖濟爾噶勒所襲札薩克輔國公。係因其父齊巴克札布軍營效力。被傷陣歿所封。索諾木多爾濟所襲札薩克鎮國公。爵係其祖父效力軍營所封。均著加恩予世襲罔替。

諭賽因諾顏親王曰。諾爾布札布所襲親王。係其曾祖

善巴來歸後從征噶爾丹有功由郡王晉封之爵賽因諾顏又係伊部舊號著加恩子世襲罔替

諭車登札布曰車登札布父親王諾爾札布未襲親王時曾賜公品級因追剿包沁有功特封貝子朕念此爵係伊本身效力所得是以于伊既襲親王之後仍令車登札布襲鎮國公著加恩世襲罔替先是親王德沁札布獻馬助軍

諭議敘尋議親王爵無可加應于伊子內選一人賞公品級德沁札布因以其第三子三丕勒多爾濟請

許之至是理藩院議三不勒多爾濟所授公品級例弗

應世襲俟出缺時請

旨

詔如議

諭伊什札木楚曰伊什札木楚所襲輔國公係伊兄額爾克沙喇效力軍營所封之爵著加恩令其世襲罔替出缺後仍以額爾克沙喇子請旨承襲

諭三丕勒敦多克所襲公爵係因伊父佛保陷賊復歸加恩所封著令其世襲罔替

諭車布登札布曰車布登札布敷歷戎行戰功懋著由台吉洊封郡王兼授札薩克著加恩子世襲罔替

諭貢楚克札布曰貢楚克札布始祖托多額爾德尼原封公爵嗣因貢楚克札布父車木楚克札布數歷戎行勲猷卓著由鎮國公洊封郡王著加恩令其世襲罔替諭德木楚克札布之父羅卜藏車璘死于王事德木楚克札布又接續臺站有功施恩由貝子晉襲貝勒著加恩令其世襲罔替先是大軍剿達瓦齊羅卜藏車璘協理烏蘭烏蘇驛務會阿逆叛逆黨阿巴噶斯哈巴等乘間劫驛羅卜藏車璘拒之戰死

詔由貝子原爵晉封貝勒令其子德木楚克札布襲諭噶爾瑪所襲輔國公係伊始祖阿玉什在軍營效力

晉封之爵貢楚克所襲輔國公係伊祖諾爾布在軍營奮勉效力由札薩克台吉晉封之爵喇嘛札布所襲輔國公係因伊祖齊旺在軍營奮勉效力封鎮國公減等承襲之爵均著加恩令其世襲罔替

諭當蘇隴曰當蘇隴始祖阿哩雅初封札薩克台吉嗣因其子格木丕勒效力軍營懋著勞績晉封鎮國公至當蘇隴又襲二世著加恩令其世襲罔替

諭沙克都爾札布曰沙克都爾札布之父多爾濟效力軍營始終奮勉又因前往軍營中途病卒朕心深爲憫惻是以令沙克都爾札布仍襲公爵著加恩令其世襲

罔替理藩院議桑濟所襲公品級例弗應世襲請出缺
後停襲

詔如議

四十七年

諭賽因諾顏部公品級三等台吉桑濟曰前議于桑濟
出缺後請旨停襲朕因其照例辦理業已允行但念桑
濟之父噶瓦于青衮咱卜作亂時不肖隨眾株守能自
備馬接遞驛務且于經過官員供給牲畜伊不過一協
理台吉誠心奮勉若此故特賜公品級噶瓦卒後朕追
念前功仍爵其子若終歸削除朕心殊爲不忍著恩予

世襲罔替賽因諾顏部札薩克多羅郡王車布登札布卒子三丕勒多爾濟襲

命御前行走

四十八年以土謝圖汗車登多爾濟車臣汗車布登札布私用烏拉票罪

詔黜

御前行走尋議削爵

上弗忍諭減等再議因議留汗爵永停給俸削盟長奪三眼翎及黃馬褂

詔削盟長罰俸五年勿奪翎褂尋因未來謝

恩

諭并奪之

授土謝圖汗部貝子遜篤布盟長以同部親王齊巴克
多爾濟庸懦無能

命解副將軍任

授同部額駙永丹多爾濟所部副將軍輔國公車布登
多爾濟所部副將軍參贊札薩克圖汗部公品級三等
台吉多岳特卒

詔其子幹珠爾札布襲尋

諭曰幹珠爾札布之祖格色克係舊札薩克圖汗沙喇

之子。

聖祖仁皇帝格外加恩。封輔國公格色克卒。朕命多岳特襲嗣。因自蹈愆尤。旋知悔懼。復賜公品級。今伊已卒。若卽將公品級削除。祇令幹珠爾札布承襲原有三等台吉。朕實不忍。是以加恩。仍令襲公品級。俟出缺時奏聞請旨。

四十九年五月。土謝圖汗車登多爾濟車臣汗車布登多爾濟迎。

觀避暑山莊。復並。

賜孔雀翎。尋。

命乾清門行走。

賜黃馬褂。

皇朝藩部要略卷之九

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張 穆 覆審

厄魯特要略一

厄魯特舊分四部曰和碩特姓博爾濟吉特爲元太祖
弟哈布圖哈薩爾裔曰準噶爾曰杜爾伯特姓綽羅斯
爲元臣孛罕裔曰土爾扈特爲元臣翁罕裔姓不著哈
布圖哈薩爾七世孫曰阿克薩噶勒泰有子二長曰阿

噶克特穆爾爲今內札薩克科爾沁等八旗祖。詳見內
札薩克。次曰烏噶克特穆爾。卽和碩特祖也。李罕六世
孫曰額森。有子二。長博羅納哈勒。爲杜爾伯特祖。次額
斯墨特達爾漢諾顏。爲準噶爾祖。部自爲長。號四衛拉
特。初皆聚牧天山之北。阿爾台山之南。後和碩特汗圖
魯拜琥。襲據青海。而土爾扈特長和鄂爾勒克。又以與
準噶爾巴圖爾琿台吉交惡。徙牧俄羅斯額濟勒河。於
是聚牧阿爾台者。惟準噶爾及杜爾伯特兩部。其和碩
特土爾扈特之支庶未徙者。亦間附牧焉。圖魯拜琥號
顧實汗。哈布圖哈薩爾之十九世孫也。其祖博貝密爾

咱始稱衛拉特汗。其父哈尼諾顏洪果爾繼之。有子六。長哈納克土謝圖。次拜巴噶斯。次昆都倫烏巴什。次卽顧實汗。又次爲色稜哈坦巴圖爾。及布雅鄂特歡。顧實汗兄弟。惟昆都倫烏巴什布雅鄂特歡留舊牧。拜巴噶斯製據西套。餘皆隨顧實汗徙青海。和鄂爾勒克者。翁罕九世孫也。其祖曰貝果鄂爾勒克。有子四。長珠勒札幹。鄂爾勒克卽和鄂爾勒克父。次衛袞察布察齊。次保蘭阿噶勒琥。次莽海。土爾扈特族。和鄂爾勒克旣徙牧俄羅斯。而保蘭阿噶勒琥與弟莽海及叔父翁貴文俱隨顧實汗徙青海。惟衛袞察布察齊留舊牧。是時和碩

特顧實汗最強爲四衛拉特之首我

太宗文皇帝崇德二年顧實汗遣使通貢閱歲乃至是爲厄魯特通貢我

朝之始

七年顧實汗偕達賴喇嘛班禪喇嘛及唐古特汗藏巴等奉表貢昆都倫烏巴什亦遣使從達賴喇嘛貢駝馬顧實汗尋擊殺藏巴汗而據其地使其子駐之詳見西藏要略

八年

遣使存問達賴喇嘛

敕顧實汗曰。有敗道違法而行者。聞爾已懲治之。自古帝王致治。法敎未嘗斷絕。今遣使敦禮高賢。爾其知之。并賜爾甲冑。使未至。顧實汗表請發幣使延達賴喇嘛。允之。顧實汗弟色稜哈坦巴圖爾來朝。貢駝馬雕翎元狐等物。並蒙

獎賚。

順治二年。顧實汗及達賴巴圖爾貢馬至。奏聞。

天使召聖僧臣等自當遵奉。達賴巴圖爾者。顧實汗第六子也。名多爾濟。時佐理藏事。

三年。以厄魯特台吉等入甘肅境。要糧賞。

詔所司議剿撫會顧實汗奉表貢

賜甲冑弓矢俾轄諸厄魯特嗣是間歲輒遣使至和碩
特族曰都爾格齊諾顏曰色稜哈坦巴圖爾曰鄂齊爾
汗曰鄂齊爾圖汗曰阿巴賴諾顏曰達賴烏巴什諾顏
曰伊拉古克三班第達呼圖克圖曰額爾德尼琿台吉
曰阿哩祿克三陀音曰噶爾第巴台吉曰瑪賴台吉曰
諾木齊台吉曰綽克圖台吉土爾扈特族曰羅卜藏諾
顏曰楚琥爾岱青曰博第蘇克準噶爾族曰巴圖爾琿
台吉曰墨爾根岱青曰杜喇勒和碩齊曰楚琥爾烏巴
什曰羅卜藏呼圖克圖並附名以達都爾格齊諾顏者

顧實汗兄昆都倫烏巴什號也。鄂齊爾汗者名達延。顧實汗長子。時理西藏務。鄂齊爾圖者號車臣汗。與阿巴賴諾顏並拜巴噶斯子。達賴烏巴什者名巴顏阿布該。阿玉什。顧實汗第四子也。拜巴噶斯初育以爲子。後雖自生子二。而達賴烏巴什仍與鄂齊爾圖兄弟同居西套。伊拉古克三班第達呼圖克圖者。鄂齊爾圖第三子也。以其爲僧。故貴之。凡呼圖克圖皆僧號也。額爾德尼琿台吉者名特爾袞。與阿里祿克三陀音瑪賴台吉並色稜哈坦巴圖爾子。噶爾第巴者。鄂齊爾圖次子也。羅卜藏諾顏者。和鄂爾勒克子。博第蘇克者。莽海孫也。巴

圖爾琿台吉者名和多和沁。李罕十四世孫。恃強侮諸衛拉特。卽與土爾扈特長和鄂爾勒克交惡者。墨爾根岱青楚琥爾烏巴什皆其弟。羅卜藏呼圖克圖則楚琥爾烏巴什子也。其和碩特之諾木齊綽克圖土爾扈特之楚琥爾岱青準噶爾之杜喇勒和碩齊則未詳所出。四年鄂齊爾圖遣使貢駝馬。越一年阿巴噶繼至。五年甘肅巡撫王世功奏青海蒙古駐西甯需索供應請定貢使入關額餘駐關外給口糧許之。

六年青海鄂木布瑚魯木什以河西白帽回族米喇印

詔賜鄂木布土謝圖巴圖爾岱青號瑚魯木什巴圖爾額爾德尼岱青號鄂木布卒。璽爾根台吉嗣。

七年鄂齊爾圖汗使至以喀爾喀煽蘇尼特部長騰機思叛奏稱力能鋤逆當相機爲之否亦必修貢如初不敢稍萌異志

筠溪山房

八年，昆都倫烏巴什貢所產馬及黑狐皮。

九年，顧實汗導達賴喇嘛入覲，先奉表聞，并貢駝馬方物。昆都倫烏巴什亦貢駝馬，嗣數遣使至。

十年

詔封圖魯拜琥遵文行義敏慧顧實汗，賜金冊印。

十二年，土爾扈特部長書庫爾岱青遣使錫喇布鄂木布奉表貢。書庫爾岱青者和鄂爾勒克子也。和鄂爾勒克有子六，長書庫爾岱青，次伊勒登諾顏，次羅卜藏諾顏，餘並無嗣，不著色稜哈坦巴圖爾遣子呵哩祿克三陀音貢駝馬。

十三年。色稜哈坦巴圖爾子瑪賴遣使入貢。伊勒登諾顏遣使錫喇尼和碩齊繼至。青海和碩特袞布游牧嘉峪關外。鄰哈密及準噶爾。諸回使往來必經之。是年葉爾羌回長遣使克拜挈眾三百人貢。抵肅州。袞布以葉爾羌嘗奪其屬。將襲之。甘肅巡撫周文煜徙貢使至甘州。袞布挈千餘騎分道入。聞官軍嚴備。遁歸。卒不敢爲邊患。袞布察罕丹津從叔父。其父達蘭泰顧實汗第三子也。是年顧實汗卒。

上念其忠勤修貢。遣官致祭。會青海屬復爲邊患。

諭顧實汗子車臣岱青及達賴巴圖爾等曰。分疆別界。

向有定例。邇來爾等率番眾掠內地。抗官兵。守臣奏報二十餘次。屢諭不悛。今特遣官赴甘肅西甯等處勘狀。或爾等親至。或遣宰桑來質。誣妄之罪。各有攸歸。番眾等舊納貢蒙古者。聽爾轄。倘係前明所屬。應仍歸中國。至漢人蒙古定界與市易隘口。務宜詳加察核。分定耕牧。毋得越境妄行。車臣岱青者名鄂木布。顧實汗次子也。

十四年。青海多爾濟表謝。

賜其父顧實汗賻祭恩。并奏稱西甯東向不設驛。貢使往來道艱。乞設驛西甯東。

不許。土爾扈特羅卜藏諾顏及子多爾濟遣使沙克錫布特達爾漢烏巴什阿巴賴等貢駝馬二百餘。復攜馬千乞市歸化城。

許之。杜爾伯特台吉陀音遣使霍什哈等自鄂齊爾圖所以貢馬至。陀音者孛罕十二世孫也。其父曰達賴泰什。有子七。次子垂因。及垂因子阿勒達爾泰什。世爲杜爾伯特部長。陀音其第三子也。第四子曰鄂木布岱青和碩齊。

十五年復

諭車臣岱青曰。前因爾等頻犯內地。遣官往勘。據奏爾

等入邊向屬番取貢輒肆攘奪咎自難解朕悉宥爾前愆但中外本無異視疆圉自有大防爾等向屬番取貢酌定人數路由正口遣頭目稟告守臣方准入邊至市易定所應從西甯鎮海堡川北洪水等口出入毋得任意取道如或不悛國憲具在朕不爾貸也是年杜爾伯特鄂木布岱青和碩齊子伊斯札布復遣使額爾克貢馬。

十七年瑪賴偕弟茂濟喇克來朝。

康熙四年甘肅提督張勇奏蒙古番眾游牧莊浪諸境情形叵測請增甘肅西甯駐防兵先是青海蒙古戀西

喇塔拉水草肥饒。乞駐牧。張勇以其地爲甘肅要隘。不容逼處。往責之。謝罪去。因設永固營。聯築八塞。至是蒙古等復相繼徙近邊。

上以其漸不可啟。

詔如勇請。

五年。勇復奏。青海雖通西藏。不過荒徼絕塞。

朝廷出示招徠。准開市易。自應鈴東部落。各安邊境。乃邇來蜂屯祁連山。縱牧內地大草灘。曾遣諭徙。復抗據定羌廟。官軍敗之。猶不悛。聲言糾衆分入河州。臨洮。鞏昌。西甯。涼州諸地。請設兵備道。

通志卷之十一
詔嚴防禦。仍善撫以柔其心。勇等乃自扁都口西水關至嘉峪關。固築邊牆。以資守禦。

六年。川陝總督盧崇峻奏。青海諸頭目。偵於八月將入寇。因赴莊浪所備之。遣總兵孫思克屯南山隘。相形勢固守。達賴喇嘛尋檄厄魯特諸台吉。毋擾內地。駐牧黃城兒大草灘。蒙古悉徙去。并獻駝馬牛羊謝罪。遂撤駐防兵。青海色稜哈坦巴圖爾少子伊思丹津爲諸昆弟所迫。了身來歸。

詔封多羅貝勒。尙縣主。授多羅額駙。

賜田產僕屬。隸內蒙古正白旗。後以罪削爵。降三等公。

十三年以吳三桂叛

遣使往諭達賴喇嘛道西甯墨爾根台吉將尼之爲我使所叱懼謝罪嗣聞三桂扇王輔臣叛梗秦蜀以所部兵屯大草灘外令軍書得達內地有準噶爾台吉罕都及拜達者旣降尋叛攜賊千餘掠番民由大草灘毀邊垣遁墨爾根台吉聞之挈其衆以大草灘饒水草來徙牧爲守汛者所禦復乞屯牧黃草灘

上不允遣尙書科爾廓代往定界尋引去王輔臣之叛青海蒙古乘隙犯河西永固營副將陳達禦之陣歿孫思克屯涼州宣示

朝廷恩威各引罪出塞會達賴喇嘛使至

命傳諭達賴巴圖爾等戢部眾勿爲邊患是歲杜爾伯特台吉額勒敦噶木布從鄂齊爾圖使入貢自稱阿勒達爾泰什族初準噶爾巴圖爾琿台吉卒子僧格嗣其異母兄車臣及卓特巴巴圖爾與爭屬產遂殺僧格有噶爾丹者僧格同母弟也居唐古特習沙門法達賴喇嘛遣歸轄厄魯特眾因執車臣戕之卓特巴巴圖爾與弟卓哩克圖和碩齊奔青海噶爾丹遂爲所部長

十六年準噶爾台吉噶爾丹以兵襲西套戕鄂齊爾圖破其部鄂齊爾圖妻曰多爾濟喇布坦與喀爾喀墨爾

根汗額列克妻皆土爾扈特汗阿玉奇女兄也。額列克
孫察琿多爾濟號土謝圖汗。偵噶爾丹侵鄂齊爾圖。兵
援之不及。多爾濟喇布坦奔土爾扈特。阿玉奇者。書庫
爾岱青孫也。先是書庫爾岱青以巴圖爾琿台吉女爲
子朋楚克婦。生阿玉奇。育巴圖爾琿台吉所和鄂爾勒
克徙牧。不復攜。時土爾扈特與準噶爾隙。然未絕。後書
庫爾岱青赴唐古特還。假道準噶爾。索阿玉奇以歸。書
庫爾岱青卒。朋楚克嗣。朋楚克卒。阿玉奇嗣。世爲土爾
扈特長。阿玉奇始自稱汗。噶爾丹爲阿玉奇舅氏。始娶
鄂齊爾圖孫女阿努爲妻。旣而惡鄂齊爾圖。遂襲殺之。

遣使獻俘。

諭曰。鄂齊爾圖汗與噶爾丹向俱納貢。今噶爾丹侵殺鄂齊爾圖。獻所獲弓矢等物。朕不忍納。其卻之。初顧實汗卒。鄂齊爾圖嗣。爲衛拉特首。噶爾丹旣戕鄂齊爾圖。自稱博碩克圖汗。因脅諸衛拉特奉其令。

諭給諸貢使符驗。不從。詭稱杜爾伯特及和碩特土爾扈特。雖隸準噶爾。以收地遠不及給云。逆藩吳三桂爲大軍所迫。謀結青海爲援。遣賊黨饋多爾濟金幣。靖逆將軍張勇謀得狀。奏松潘茂州道通西甯。近吳逆乘間掠茶馬利。

詔張勇屯甘州防禦。多爾濟卒不助吳逆。西套厄魯特
既潰。或奔依達賴喇嘛。或被噶爾丹掠去。和囉理者達
賴烏巴什子也。號巴圖爾額爾克濟農。率族屬避居大
草灘。廬幙萬餘。守汛者遣之去。仍逐水草徙。戀處邊外。
青海和碩特諸台吉亦懼噶爾丹暴掠。並挈廬幙避居
大草灘。撫遠大將軍圖海飭歸故巢。

十七年。西套諸台吉偵噶爾丹將侵青海。遣使告和碩
特台吉達賴巴圖爾等。爲防禦計。

上聞之。諭靖逆將軍張勇曰。噶爾丹侵青海。如遠從達
布素圖瀚海往。則聽之。若欲經大草灘。則令堅立信約。

勿擾內地。尋噶爾丹以從者異志。且距青海遠。行十一日。撤兵歸。遺書張勇。詭稱其祖多克辛諾顏。偕顧實汗取青海。和碩特族獨據之。欲往索。以將軍所轄地。故不果。旣而懼和碩特諸台吉襲已。密遣使議昏。以女布木妻博碩克圖濟農子根特爾。張勇謀得狀。奏噶爾丹仇青海蒙古。假議昏名。恐復往侵。甘肅當往來衝。請增兵防。

報可。博碩克圖濟農者。顧實汗第五子伊勒都齊子也。和囉理遣使至靖逆將軍所。稱避亂赴青海。以邊外道遠。乏水草。請由內地行。張勇遵。

旨諭由水泉過邊和囉理戀牧大草灘草盡北徙不果
赴青海偵噶爾丹屯布隆吉爾慮襲已由雙井避入內
地甘肅提督孫思克請率兵防禦時張勇屯甘州

諭令親泣驅遣和囉理謝去徙牧額濟內河界遣宰桑
博克等奉表至孫思克營服罪有楚琥爾烏巴什者噶
爾丹叔父也子五長巴哈班第次阿南達次羅卜藏呼
圖克圖次犖章次羅卜藏額璘沁噶爾丹以私憾襲殺
巴哈班第執楚琥爾烏巴什及羅卜藏額璘沁等禁之
巴哈班第子罕都爲和囉理甥時年十有三其屬額爾
德尼和碩齊攜之逃以兵四百掠烏喇特戶畜竄就和

囉理居額濟內河青海墨爾根台吉聞之遣使詰歸所掠而和囉理弟土謝圖羅卜藏等亦掠甯夏及茂明安鄂爾多斯諸部和囉理不知也喀爾喀台吉畢瑪里吉哩諦偵以告詞及和囉理及青海台吉茂濟喇克等是年噶爾丹弟溫春台吉附噶爾丹表入貢

十八年

遣使赴和囉理所詰責掠烏喇特諸部罪且

諭達賴巴圖爾等曰爾墨爾根台吉將被盜劫掠人察獲解送朕甚嘉之夫勸善懲惡者國之法也邇聞厄魯特衆侵處額濟內河爾達賴巴圖爾及墨爾根台吉其

照汝國律治罪。使至稱和囉理茂濟喇克皆無掠烏喇特事。額爾德尼和碩齊爲準噶爾屬。已徙牧去。察歸所掠之未售者十八人。和囉理復獻馬百餘。爲弟請罪。諭曰。和囉理旣未行劫。可弗罪。

詔檄噶爾丹收捕額爾德尼和碩齊治罪。并收和囉理歸牧。或非所屬。當以告。

十九年。

遣官駐松潘。偵厄魯特邊情。

詔檄多爾濟知之。勿疑懼。噶爾丹尋與喀爾喀構兵。遣使乞援。青海多爾濟遵達賴喇嘛諭。不之許。

二十年和囉理遣使入貢。

詔納之。

二十一年和囉理以前年缺貢補解馬至其母格楚爾哈屯弟土謝圖羅卜藏博第等各遣使至奏荷。

帡幪居邊境屬眾妄行盜竊深知悔罪又游牧邇甯夏乞赴市理藩院仍追議前罪。

諭曰和囉理等以敗竄來至邊境所部罔知法紀迫於饑困盜竊牲畜等物今既陳其苦情諄諄奏請著寬免前罪嗣後鈐束屬眾勿得妄行滋事其甯夏地向無厄魯特喀爾喀市易例所請不允溫春台吉復遣使至尋

卒子丹濟拉依噶爾丹。

二十二年噶爾丹奏和囉理等往歸達賴喇嘛已遣使召之請以丑年四月爲限是年蓋歲癸亥也和囉理徙牧河岸逼鄂爾多斯貝勒松喇布以聞。

諭退歸。

二十三年罕都偕額爾德尼和碩齊遣使貢請宥掠烏喇特罪而和囉理戚屬嘗掠茂明安諸部牧產前以服罪故宥之至是

諭曰和囉理旣免罪額爾德尼和碩齊著一體赦宥所貢准上納先是鄂齊爾圖孫羅卜藏袞布阿喇布坦避

噶爾丹走唐古特以達賴喇嘛表請

賜居龍頭山轄西套遺衆

命兵部督捕理事官拉都琥往勘奏言龍頭山蒙古謂之阿拉克鄂拉乃甘州城北東大山山脈綿延邊境山口卽邊關建夏口城距湟川堡五里山盡爲甯遠堡距龍頭山里許有昌甯湖界之內地兵民耕牧久似不宜令新附蒙古居

上可其奏羅卜藏袞布阿喇布坦尋徙牧布隆吉爾土謝圖汗察琿多爾濟以女妻之事聞

諭廷臣曰前鄂齊爾圖汗爲噶爾丹所戕其孫羅卜藏

袞布阿喇布坦往求達賴喇嘛指授所居之地達賴喇
嘛令駐牧阿拉克鄂拉因以爲請鄂齊爾圖從子和囉
理前沿邊駐牧曾檄噶爾丹收取之今羅卜藏袞布阿
喇布坦與喀爾喀互相犄角噶爾丹欲以兵向和囉理
等則恐喀爾喀躡之欲以兵向喀爾喀則恐和囉理等
襲之此必非噶爾丹所能收取矣丹濟拉偕弟達爾札
札木揚附噶爾丹表入貢噶爾丹性殘虐諸台吉宰桑
惟善丹濟拉與阿喇布坦丹津鄂木布格類固英信丹
濟拉尤篤有事必與謀

二十四年和囉理請

賜敕印以鈐部衆。廷臣以游牧未定。議不允。

諭曰。和囉理等以避亂故。離其舊牧。來至邊境。劫掠茂明安烏喇特諸部。本宜卽行殄滅。朕俯念鄂齊爾圖汗世奉職貢。恪恭奔走。兼之彼亦迫于饑困。是以宥其罪戾。又羅卜藏袞布阿拉喇布坦。係鄂齊爾圖汗孫。爲和囉理從子。應令聚合一處。其遣官往諭朕旨。度可居地。歸併安置。封授名號。給賜金印璽書。以示朕興滅繼絕至意。理藩院尙書阿喇尼遵旨往諭。和囉理奏。

皇上令臣等聚牧。乃殊恩。達賴喇嘛亦謂羅卜藏袞布

阿喇布坦居布隆吉爾地。隘草惡。不若與臣同處。臣等欲環居阿拉克山陰。遏寇盜。靖邊疆。令部衆從此地而北。當喀爾喀台吉畢瑪里吉哩諦牧地。由噶爾拜瀚海額濟內河。姑喇奈河。雅布賴山。巴顏努魯喀爾占布爾特。洪果爾鄂隆以內。東倚喀爾喀丹津喇嘛牧。西極高河居之。奏至。

遣使諭達賴喇嘛曰。噶爾丹滅鄂齊爾圖汗時。和囉理及羅卜藏。袁布阿喇布坦等。紛紜離散。來至邊境。又以生計窘迫。妄行劫掠。朕宥其罪。不卽發兵剿滅。和囉理等亦戴朕恩。屢請敕印。依朕爲命。朕前諭噶爾丹收取。

彼約以丑年四月爲期。今逾期已數月矣。伊等骨肉分離。散處失所。朕心殊爲惻然。鄂齊爾圖汗于爾喇嘛爲護法久矣。何忍漠視其子孫宗族。至於窮困。今朕欲將伊等歸併安置。爾喇嘛其遣使與朕使偕往定議。冬和囉理率屬七百餘來朝。

詔以二百人入關。餘留歸化城。給羊及宣府貯米贍之。是年定四衛拉特貢使例。噶爾丹使入關。額二百人。餘屯張家口及歸化城。其綽囉斯自貢之噶爾瑪岱青和碩齊杜爾伯特台吉阿勒達爾泰什及和碩特土爾扈特長如之。噶爾瑪岱青和碩齊者善爾根岱青子也。名

丹津於噶爾丹爲從兄弟。青海巴圖爾額爾德尼岱青
瑚魯木什來朝會。

上大閱於王家領。奏請扈

駕往觀。

允之。歸牧。謀噶爾丹侵略爾喀。以所部兵屯邊。謀助大
軍討逆。噶爾丹敗遁。乃率兵還。

二十五年春正月。和囉理至京。

賞宴。視大台吉例。以

御服貂裘賜之。

諭曰。爾祖額實汗于

太祖文皇帝時。偕達賴喇嘛輸誠通款。爾叔父鄂齊爾圖當

世祖章皇帝時。每年遣使請安。所貢土產白鷹。朕猶及見之。夫貢物何足珍賞。特鑒其誠敬耳。爾厄魯特內亂。噶爾丹攻滅鄂齊爾圖汗。遣使獻俘。朕念鄂齊爾圖汗前此勉修誠悃。俟爾敗亡。不勝軫恤。何忍受之。因諭卻所獻。頃爾爲噶爾丹擊敗。奔至邊境。劫掠沿邊居民牧產。朕何難遣兵剿除。明正爾罪。念爾昔時頗竭誠悃。復引罪自首。以迫于饑困。屬衆妄行等情。陳奏。朕卽宥爾罪。今若徙爾于邊境內外。不拘安置何地。爾焉敢不凜

遵特念爾祖額實汗爾叔父鄂齊爾圖汗素致恭謹故
俾爾絕者復繼散者復聚欲使鄂齊爾圖汗孫羅卜藏
袞布阿喇布坦與爾聚處尙其其相輯睦善自安業爾
等聚處與否在朕本無損益惟是朕爲天下主凡在函
蓋咸欲使之共樂昇平朕茲諭旨自爾身及爾子孫當
世世念之勿替尋遣歸

賜牧阿拉善地會達賴喇嘛遣使至

命拉都琿往會勘

諭曰爾等召集和囉理羅卜藏袞布阿喇布坦等相視
可以游牧地指給定所其額爾德尼和碩齊等如欲與

同牧亦許之前和囉理已自誓不復令屬眾爲非其羅卜藏袁布阿喇布坦亦須嚴禁所屬和睦安居爾等可與和囉理等定沿邊爲盜作亂之罪朕所以不憚諄切訓諭者亦以其先世恭順有年不欲令子孫失所也倘伊等復流亡他徙殊負朕歸併眷恤之意矣拉都琥偕達賴喇嘛使約和囉理等至東大山北語之曰爾所請噶爾拜瀚海地聽爾游牧外自甯夏所屬玉泉營西羅薩克喇山嘴後至賀蘭山陰一帶布爾哈蘇台口又自甯夏所屬倭波嶺塞口北努渾努魯山後甘州所屬鎮番塞口北沿陶蘭泰薩喇椿濟雷琿希理等地西向至

額濟內河俱以距邊六十里爲界。畫地識之。定議蒙古殺邊民論死。盜牲畜奪食物者鞭之。私入邊游牧者。台吉宰桑各罰牲畜有差。所屬犯科一次。罰濟農牲畜以五九。時罕都及額爾德尼和碩齊請與和囉理同牧。羅卜藏袞布阿喇布坦偵其女兄阿努。攜兵千赴藏。道嘉峪關外。懼襲已備之。以故未卽徙。拉都琥奏至。

詔以所定地域及罰例檄甘肅守臣知之。蓋自是和囉理屬始定牧阿拉善。

二十七年。噶爾丹侵略爾喀。和囉理欲往援。察琿多爾濟乞師于。

朝時

諭噶爾丹罷兵使已就道

詔不允和囉理請而羅卜藏袞布阿喇布坦自率兵援喀爾喀遇我使于道宣諭之亦撤歸布隆吉爾先是噶爾丹收東鄰喀爾喀久涎富庶謀往掠又怨喀爾喀土謝圖汗察琿多爾濟嘗助鄂齊爾圖且以女妻鄂齊爾圖孫羅卜藏袞布阿喇布坦欲攻之會察琿多爾濟匿札薩克圖汗成袞逃眾與成袞構釁成袞卒于沙喇嗣釁如故達賴喇嘛遣使噶爾旦西勒圖召察琿多爾濟與沙喇盟于庫倫伯勒齊爾察琿多爾濟弟哲卜尊丹

巴呼圖克圖與噶爾旦西勒圖抗禮。噶爾丹因以責哲
卜尊丹巴呼圖克圖不敬達賴喇嘛爲名。誘沙喇往會
于固爾班赫格爾。察琿多爾濟邀殺沙喇。又追殺噶爾
丹之弟多爾濟札卜。進屯喀喇額爾奇克。察罕額爾奇
克地與噶爾丹相拒。噶爾丹乃引兵三萬由杭愛山入
掠。察琿多爾濟禦之于特穆爾不克。走翁吉。噶爾丹偵
哲卜尊丹巴呼圖克圖居額爾德尼昭。遣其弟罕都阿
拉布坦往攻。而自領兵東趨克魯倫河。略車臣汗牧。尋
還掠圖拉。察琿多爾濟悉衆由尼列圖至鄂爾會諾爾。
鏖戰三日。衆潰。喀爾喀全部皆潰竄。先後款關內附。噶

爾丹上書訴其棄好興兵妄殺無辜請勿納

上復遣使諭噶爾丹將行

命之曰噶爾丹若問和囉理事爾等宜述丑年之約并
言達賴喇嘛向雖遣使定議令和囉理與羅卜藏袞布
阿喇布坦歸併安置迄今尙未同居和囉理雖駐牧邊
地亦未編設旗隊前喀爾喀與厄魯特交惡和囉理曾
請兵討爾朕仍諭遣之曰朕欲使爾等安處游牧而已
豈肯給爾兵耶其以是告之令罷兵使如
旨諭之噶爾丹不從

詔土默特都統阿喇約偕副都統阿迪等選兵偵禦噶

爾丹

二十八年羅卜藏袞布阿喇布坦卒

賜賻祭初鄂齊爾圖子三長額爾德尼子噶爾直多爾濟次噶爾第巴子卽羅卜藏袞布阿喇布坦次伊拉古克三班第達呼圖克圖羅卜藏袞布阿喇布坦無嗣其妻及宰桑等請召噶爾直多爾濟轄部衆

允之時噶爾直多爾濟游牧準噶爾界

諭曰羅卜藏袞布阿喇布坦率衆內附所遺部衆恐致流亡噶爾直多爾濟尙幼召之恐未卽至著和囉理前往布隆吉爾暫爲約束人民俟噶爾直多爾濟至仍歸

本地務期共相扶掖勿侵據所部眾噶爾直多爾濟以所部饑告不卽從

詔授諾顏號遣侍讀學士達琥恤所部貧民其母珠木蘇尋攜噶爾直多爾濟至

詔轄羅卜藏袞布阿喇布坦眾附阿拉善牧有拜達者罕都屬也偕額爾德尼和碩齊誘其主棄和囉理私以厄魯特兵千掠邊番守汛者責之爲所戕且抗官軍甘肅提督孫思克以兵屯邊將剿之罕都懼乃降

詔宥其罪仍駐牧阿拉善其叔父羅卜藏額琳沁尋自準噶爾至奏爲噶爾丹所禁十餘年以準噶爾與喀爾

喀戰乘間脫走。挈孥屬千人至乞與兄子罕都同居。允之。有羅卜藏者。輝特族。姓伊克明安。初爲準噶爾台吉。避噶爾丹虐。從噶爾直多爾濟內附。詔附阿拉善牧。

二十九年。噶爾丹復由烏達罕嶺。侵喀爾喀。罕都阿喇布坦。白茂岱。喀喇色古爾山陰。以兵會罕都阿喇布坦。皆都爾格齊諾顏丹津孫也。與噶爾丹聚牧阿爾台之科布多。仍各領部眾。父曰都噶爾。故阿拉布坦以所部台吉多同名。從其祖父稱別之曰丹津阿喇布坦。又名都噶爾阿喇布坦。六月。我尙書阿喇尼等與噶爾丹戰。

于烏爾會失利。七月噶爾丹深入烏珠穆沁地。

命裕親王福全爲撫遠大將軍。皇子允禔副之。出古北口。恭親王常甯爲安北大將軍。簡親王雅布。信郡王鄂札副之。出喜峰口。尋停止。恭親王兵。

命帥師往會裕親王軍。又。

命康親王傑書率兵駐歸化城。

上親巡兵至博洛河屯回。

鑾濟隆呼圖克圖噶爾丹各使人至我參贊大臣索額圖營。請以土謝圖汗哲卜尊丹巴昇噶爾丹。我參贊大臣叱之。濟隆呼圖克圖者達賴喇嘛所遣諭。準噶爾罷。

兵使也不能諭止。反導之入邊。又爲之擇戰日。故噶爾丹益猖獗。時噶爾丹屯烏蘭布通。距京師七百里。倚險結營。祭旗誦經。裕親王等于八月朔。列兵徐進。自未時交戰。至掌鐙時。大敗之。斬殺甚多。以昏夜地險。收兵。次日。伊拉古克三呼圖克圖。自噶爾丹所來。復請以土謝圖汗哲卜尊丹巴界之。越兩日。濟隆又率弟子七十餘人來營講解。伊拉古克三呼圖克圖者。

上前所遣往諭噶爾丹罷兵使也。尋噶爾丹自西拉穆楞河。夜遁。剛阿淖爾我軍欲追。而馬力已疲。乃使人偕濟隆呼圖克圖往諭。設誓定好。噶爾丹使持書至。告曰。

噶爾丹博碩克圖汗跪于威靈佛前誓曰若違此書惟
佛鑒之其書云今倘蒙

皇上惠好自此不敢犯喀爾喀裕親王等入奏

廷議以噶爾丹乃極狡詐之人屢遣使以立誓爲辭今
又劫略克什克騰之三佐領矣宜命噶爾丹堅誓而釋
之裕親王等尋奏言我使伊拉古克三齋噶爾丹奏章
還其詞曰伏蒙鑒照下情普使安全正在歡忭謹上書
爲永遠不絕之書又使人云噶爾丹頂佛像設誓曰

聖上卽佛天乞宥我罪凡有諭旨謹遵行今往界上駐
札候旨尋又據濟隆持噶爾丹誓書來且述噶爾丹之

言曰我蒙王及皇太子見憐我正歡忭云云

廷議以噶爾丹不敢抗拒

天威設誓請罪應准所誓令出邊候

旨十月噶爾丹遁出汎界具疏謝罪

詔撤回裕親王兵及防守遵化州綠營兵十一月達賴喇嘛率唐古特青海台吉及噶爾丹請上尊號

詔不允初僧格之死有子三長曰策妄阿喇布坦次日索諾木阿喇布坦次日丹津鄂木布及噶爾丹爲厄魯特長不善撫之反虐殺索諾木阿喇布坦且奪策妄阿喇布坦議聘之妻阿海阿海者阿努女弟也策妄阿喇

布坦由是怨噶爾丹。與僧格舊臣七人率部眾遠徙額琳哈畢爾噶。又徙博囉搭拉。至是偵噶爾丹侵喀爾喀。潛兵至科布多。掠噶爾丹妻阿努及牲畜去。是年。

上遣使赴策妄阿喇布坦所。歸經嘉峪關。爲青海台吉阿奇羅卜藏所掠。甘肅提督孫思克誘執其宰桑懼反。我使遣兵擊之。斬馘四百餘。獲駝馬牛羊千計。阿奇羅卜藏遁。思克檄青海台吉等歸所掠。薩楚墨爾根台吉遣宰桑詰阿奇羅卜藏罪。察獲畜械盡以獻。復代謝罪。上以薩楚墨爾根台吉等恭順。

詔宥之。

三十年正月

上以噶爾丹雖認罪立誓上書請降而人極狡詐宜發兵豫備

授都統瓦岱定北將軍往張家口都統郎談安北將軍往大同聞噶爾丹劫略墨爾根濟農巴圖爾額爾克濟農向青海而去

命陝西西安將軍總督等率兵于甯夏備之二月策妄阿喇布坦遣使奏與噶爾丹交惡始末厚賜遣之

賜噶爾丹敕畧曰喀爾喀逃來人言汝厄魯特牲畜已

盡無以爲食人被疾疫死亡相繼其移近邊汛當加恩厚賜如決計入降益從優撫養四月

上親巡邊外蒙古編立喀爾喀七旗與四十九旗等先是噶爾丹侵喀爾喀逼阿拉善境

諭和囉理內徙會其部眾掠喀爾喀丹津額爾德尼牧畜有拒者輒格殺之事聞

上以和囉理仍留阿拉善牧將不靖

詔徙歸化城將置諸察哈爾復

諭甯夏兵防護之將軍尼雅漢等聞

命旬餘始赴和囉理以駐牧阿拉善人不願內徙聞大

軍將至。懼討。率眾竄。詭稱駐西喇布里圖待命。尼雅漢遣諭曰。大兵來。非討汝。以徙汝歸化城。虞中道爲喀爾喀擾故耳。汝若此。豈不悖哉。和囉理不從。與噶爾賚多爾濟羅卜藏額琳沁罕都等分道竄。尼雅漢追至庫克布里圖。不及。以所部牧畜歸。招降噶爾賚多爾濟屬納木喀班爾等五十餘戶。和囉理女弟之夫克奇及從者二十一人以聞。

詔安置歸化城。以所得牧畜給丹津額爾德尼。復

諭曰。朕思黃河冰凍時。恐和囉理等以流兵掠我西界喀爾喀。其令鄂爾多斯烏喇特喀爾喀各整兵備之時。

和囉理弟博第游牧中衛邊外距阿拉善三百餘里聞其兄叛遁欲往會偵副將陳祚昌等屯昌甯湖遣子索諾木至軍詭稱假道詣南山否則請牧馬昌甯湖祚昌知爲緩軍計令挈屬至歸化城不從擊之斬五百餘級博第僅以身免走伊巴賴遇和囉理屬台吉齊奇克假糧馬竄額濟內河和囉理尋悔罪挈屬二千餘棲牧額濟內河之明安雅瑪圖

上聞之諭曰前和囉理來歸朕給地安置不思圖報反劫內附喀爾喀因令徙居察哈爾復違命遠竄朕以向加養育並無執殺之意彼欲游牧何地惟其所擇但不

得擾害邊塞耳。孫思克奏噶爾丹巢距邊近。策妄阿喇布坦雖與交惡。恐復合。侵青海道。必經嘉峪關外。肅州密邇青海。請設兵三千爲備。報可。

三十一年。將軍瑪拉遣侍衛阿南達往招和囉理。和囉理乞降。且請遣子來朝。

諭曰。和囉理雖悔罪。或因時序不宜。馬匹羸瘠。不得已乞降。遣子往返之際。馬匹休息。又復爲遁逃計。其其商徙入內地策。瑪拉奏和囉理感

仁恩。不忍悖棄。前遣使陳情。以道阻未達。故招檄甫至。

不自疑。臣親率和囉理及色目五十餘人至甯夏。其屬眾餒甚。請

賜給糗糧。令鄂爾多斯蒙古送至歸化城。

詔允之。

諭入覲。和囉理偕次子玉楚木馳至。泣服罪。仍

賜牧阿拉善。羅卜藏額琳沁罕都齊奇克等從和囉理降。尋復叛走。提督孫思克以兵追至庫勒圖。斬四十餘級。齊奇克就擒。

詔宥死。附和囉理牧羅卜藏額琳沁罕都逸。遇自青海來歸之喀爾喀台吉阿海岱。青班第掠其貲。復竄哈密。

策妄阿喇布坦使旣歸。

上遣員外郎馬迪齎

敕諭絕噶爾丹。道哈密。羅卜藏額琳沁罕都等。偕噶爾丹屬圖克齊霍什哈。哈爾海達顏額爾克。以兵劫之。由大草灘毀邊垣遁。爲青海台吉額爾德尼納木札勒所擊。走死。以和囉理降。

詔撤鄂爾多斯諸部備兵。唐古特第巴僞爲達賴喇嘛奏。請以和囉理徙牧青海。

敕責之。

三十二年。昭武將軍郎坦奏青海諸台吉私與噶爾丹

通問請屯兵哈密絕往來踪

上以自烏蘭布通之捷邊警稍熄且青海諸台吉素恭順

詔寢議噶爾丹尋屯牧巴顏烏蘭逼內汛

詔西甯設戍兵唐古特部第巴陰比噶爾丹復詭爲達賴喇嘛奏稱青海諸台吉無異志請撤戍

諭曰此爲征剿噶爾丹計非防青海諸台吉也會議剿噶爾丹

詔檄青海眾勿驚懼先是喀爾喀爲噶爾丹所敗有阿海岱青班第者奔青海依多爾濟久之隻身歸戚屬百

餘仍留青海薩楚墨爾根台吉育之至是

遣官往取悉遵

諭送歸

三十三年和囉理上書自理稱前鄂齊爾圖汗歲奉職貢噶爾丹兵起臣不獲已挈眾內徙自

賜牧阿拉善後所部富安臣前入覲蒙

恩以鄂齊爾圖汗進貢往來諸密旨遣官傳諭至今銘心不忘後使臣徙內地臣畏大兵威且屬眾已潰故未卽至然臣雖奔遁不敢負

聖恩留處邊外望

綸音如重生。臣以族屬困餒。不獲內徙。請

賜收舊地。蒙

恩允許。又察令臣戚屬完聚。願集游牧之衆。捐軀效力。向以無知失信。每念及。輒懊欲死。乞

賜鑒恤。

上慰諭之。和囉理弟博第。率屬百餘降。乞仍與兄同牧。許之。

命和囉理輯所屬潰散者。未幾。齊奇克復叛遁。和囉理遣所部莽柰霍什哈等。以兵追諸耨爾格山。諭之降。不從。擊斬之。杜爾伯特台吉巴拜來歸。巴拜者陀音子也。

附牧噶爾丹戚屬多爲所取畏不敢爭嗣從噶爾丹侵喀爾喀至烏蘭布通欲棄之降爲伊拉古克三呼圖克圖所陰阻至是偕從子齊克宗至上以其習邊外不便駐內地

詔隸喀喇沁牧